

四庫全書

集部

欽定四庫全書

集部  
林蕙堂全集卷十九

詳校官檢討臣劉錫五

助教臣常循覆勘

總校官編修臣王燕緒

校對官助教臣卜維吉

謄錄監生臣朱上林

欽定四庫全書

林蕙堂全集卷十九

湖州府知府吳綺撰

亭臯詩集

七言律

贈趙尊客

趙壹風流客共傳  
翛然鶴立似神仙  
愛尊直走三千里  
種樹今來二十年  
碧嶂高低橫醉眼  
玉臺左右倚吟肩

如何更戀湖光好蘇小門前又放船

家六益招同廬文子飲藻野閣

閣為陳徵君故居

故人相見即軒渠風雨高樓坐嘯餘世上有心惟縱酒  
閣中何意又藏書六朝山水留尊繪一代文章重草廬  
此日荆榛方滿目可憐叢桂未全虛

又

高閣嶙峋傍水涯西風百里聽吹笳太丘長者曾題壁  
綺里先生近住家十萬青蚨春買樹一雙白燕曉穿花

吟成梁父還搖膝  
陸瑁湖邊日又斜

贈張帶三先生

鶴髮垂肩已似銀  
飄然終日尚尋春  
信惟前代留斯老  
那得後生如此人  
綵筆縱橫曾未倦  
青尊潦倒竟忘貧  
閒來愛共麻姑語  
滄海何年見起塵

贈張洮侯

彥之

平子翩翩逸世情  
披裘帶索晚逃名  
高談直上三公坐  
古調偏長五字城  
盡日不妨沾酒卧  
隔山長為看花行

那堪又作河梁客何處雙柑更聽鶯

贈錢武子德震

屈指論交三十年仲文高致益蕭然無家每就門生宿  
有句爭為過客傳百尺自高誰得上一寒猶在不求憐  
近來機事渾相忘鷗鳥羣遊向海邊

贈趙雙白炎

閩客浮家泖水湄孤踪不許俗人知春衣盡典綠沽酒  
晨突無煙獨愛詩晞髮未忘文信國論心常憶鄭當時

如何忽作思鄉曲  
擷采幽香絕妙詞

贈答張帶三先生

夢繞茸城復幾年  
高齋今得話從前  
長司花月何辭老  
自主溪山即是仙  
連理尚留三徑樹  
分香猶卧一池蓮  
北窓更放烟鬟入  
九點秋光到酒邊

集錢越江軒中分得西字

謝家芳墅苧城西  
倦客來遊路未迷  
八月風華當晝暖  
九峯煙樹向秋齊  
昔時咸籍杯同把  
此夕鄒枚簡共題

自是仲文情不淺鱸魚特為買松谿

酬別魯謙菴即用見贈原韻

舊雨關心近暮年訪君我泛涖湖煙三更夜話雙椽燭  
萬里寒裝一硯田循吏已知清似水故人行更遠如天  
無端忽鼓看山興又損冰厨買酒錢

留別涖上諸子仍疊謙菴原韻

離別何堪動隔年楚江惆悵各風煙情多幾見飛鴻雪  
游倦曾無養鶴田明月送人過涖水青山留客繞湖天



何時更醉臨邛酒  
卓女爐邊看數錢

機山

渺渺寒蕪沒斷碑  
淒然倚楫向江湄  
思鱸不起秋風興  
唳鶴空傳夜月悲  
山水已隨人變易  
文章不問世安危  
平原只有東頭樹  
猶見征衫入洛時

寄懷宗鶴問秋浦

閒房草色雨中新  
玉案長吟欲過春  
五夜正多千里夢  
一官難補百年貧  
溪山有待彈琴客  
花月無聊作賦人

見說子才能折節煩君先掃半牀塵

江行有感

江上寒蘆綠盡抽江邊行客自夷猶  
鮮鱗入饌初離網飛燕過牆故傍舟  
潮打石頭還帶怒雲連鐵甕不遮愁  
斜陽最是無聊賴難為齊梁頃刻留

揚帆北岸過采石不能登舟中以酒遙酌太白  
先生并望常開平戰處

風激高崖帆轉遲中流遙指碧參差  
人非文字難傳世

事到英雄亦有時  
西蜀奇才明月在  
東吳王氣晚潮知  
蘭成老去誰相識  
獨倚扁舟多所思

遊齊山和杜牧之韻

尋山有約興先飛  
笑我前身杜紫微  
手挽藤蘿還自上  
跡隨麋鹿肯言歸  
雲因出洞成奇石  
潮欲連江競夕暉  
便合掛瓢從此住  
不堪塵染陸郎衣

贈池陽太守喻武公

九子晴嵐曉翠籠  
謳歌遙聽滿江東  
共聞童叟傳新事

喜見循良有古風為政誰能如召父讀書爭欲就文翁  
行春紫馬尋常到長命欣看彩縷紅

又

蓋代聲華羨子才一時公望獨崔嵬清能潤物心如水  
響欲驚天手似雷野老共看持酒至遠人還為和詩來  
應知名世生非偶高戶何難及上台

贈別駕田牧園

金臺舊雨久思存放棹春江及李門明月一年桃葉渡

清風四野杏花村  
賜環竚見君恩重  
題柱原知物望尊  
何意西齋還對酒  
奇文卜夜又同論

雨中郎趙客偕家惟鄰過訪

為尋秋浦叩華局  
幾宿西齋雨共聽  
雙屐偶來三徑碧  
一尊同對九峰青  
江山有恨人將老  
風月無聊客暫停  
從此潁川傳故事  
天邊新聚少微星

過池陽書院簡喻武公太守二首

幾年兵燹遍蒿萊  
此地爭傳絳帳開  
一代菁莪身自教

千林桃李手親栽  
筵陳廣榭三鱣集  
洞啟名山一鹿來  
常袞只今多雅化  
翩翩鵲起盡奇才

又

華堂百尺采霞披  
濂洛風高道在斯  
誰解得民先得士  
人能為父更為師  
堦前月照春絃夜  
席上雲生晝講時  
從此東南人就學  
文翁絃誦謝公詩

夏日留別宗遺山之粵東

離腸已盡更留連  
此後音書不易傳  
二十餘朝如頃刻

七千多路各山川  
貧中送別非佳况  
老去傷離異壯年  
所願琴書兩無恙  
猶能沉醉百花前

遊湖山小飲歸飲月下分韻

主人愛客為紓愁  
挈榼聊為近郭遊  
亂蛩宵香樵徑暖  
一鷄啼竹酒壚幽  
江光隱映山光見  
樹色參差月色浮  
歸向西窓重續醉  
滿檐涼影燭初收

徐孺子墓

兩京黨禍遍君宗  
獨羨鴻冥竟可容  
一榻久為千古墓

孤墳曾歷累朝封傷心地地下生芻客舉眼人間賣菜傭  
惆悵陳蕃更何處蓬蒿空見卧孤踪

丁鴈水觀察招同龔衛公錢目天暨令弟韜汝  
及仲兒遊通天巖分賦

登陟來隨叔子同芙蓉百丈倚晴空巖前布席原無雨  
洞裏披襟不待風一刻陰晴山向背百盤高下徑西東  
此時真有忘歸興况值蓬飄在客中

鬱孤臺



望闕偏宜晚照開  
籃輿乘興獨登臺  
萬家雨過虹初隱  
二水秋生雁未來  
清獻遺踪空感慨  
端明往事自徘徊  
詩人最愛丁公雅  
恨不同傾濁酒杯

丁觀察社集八境臺同家觀莊陳緯雲錢目天  
龔衛公暨令弟韜汝及仲兒分得齊庚二韻  
有約論文上玉梯  
一尊公暇又同攜  
此時北海心相得  
往事東坡手自題  
向水樓臺天外迴  
繞城烟樹雨中齊  
主人愛客情無倦  
遙指疎林月上低

又

相將弔古意難平  
況復登高感倍生  
百雉遠圍秋浪濶  
一鴻斜背夕陽明  
悲歌不了孤臣跡  
俯仰徒留過客情  
勝地只因人更勝  
笑他銅雀草縱橫

雁水屢餉酒米以病未能踵謝賦此代柬

四海論交有幾人  
濟陽兄弟獨情親  
平分客舍三升米  
寧問官廚一甌塵  
知我晚憐身已老  
感君多為意全真  
饑童卧起聞相告  
彈鋏馮驩近不貧

雁水招飲覽園分得才字

韓柳寧知異代才官齋清夏共銜杯風因地靜非常好  
花為春多不次開士行憂時還運甓子瞻懷古更登臺  
留賓最喜高情甚索句無煩暮酒催

家觀莊憲副至自和陽喜而有賦

西清聯轡賦同心王粲從軍別至今二十七年分去就  
百千萬種歷升沉宦途淪落詩空老客舍淒涼酒共斟  
屈指故人仍有幾鬢華休歎雪霜侵

雁水昆仲過曾波閣小集分賦

高軒一路紫蘭芬  
翠蓋亭亭靄暮雲  
濠濮興高還撒燭  
瑯瑯情重欲書袞  
曾波得月光相射  
芳樹浮烟影不分  
此夕凭欄意何限  
輞川詩句讓諸君

又

桂華初滿映芳汀  
鄴下才人到水亭  
藻荇渾如天聖道  
芙蓉却似楚騷經  
此時有客心同素  
當代憑誰眼更青  
只恐夷門車騎近  
畫橋煙笛憶同聽

鮑子韶招集蓮社菴分韻

花宮門外水潺潺絕勝東林足閉關看竹王猷能共到  
聞鐘陶令輒空還別離漸減中年樂愁病難期半日閒  
却羨宗雷清興在傾殘米汁白雲間

又

作客同為半道留一時酬倡遍南樓正來鹿苑停雲席  
又放羊城泛雪舟十日酣歌欣遇趙半生潦倒愧依劉  
獨憐花柳成辜負那得探驪好句投

留曹大行石閭夜飲曾波閣分韻

客裏風光此最幽，披襟深喜故人留。  
榕陰滿地月初午，荷葉半池花已秋。  
阜帽參差橋上笛，紅燈歷亂水邊樓。  
多君更有高陽約，同向青山號醉侯。

王汲公招飲八境臺即席書贈

兩江煙水對高樓，子晉還為載酒謀。  
客裏尚能招客隱，人間同作避人遊。  
高歌共舉梅花釀，好夢難逢竹葉舟。  
明日河梁須放棹，津亭空憶夕陽秋。

丁觀察招集覽園飲古桂下時桂上忽生靈芝  
欲去還留又幾回感君情重每追陪日來坐待神芝長  
秋到難虛老桂開客醉異香非世賞天存勝跡豈凡栽  
地靈元自因人發為祝先生酒滿杯

南安客舍送查德尹歸海昌

九日峯前太瘦生相逢客舍兩含情參軍正欲攜琴去  
詞客還為擁棹行路迴三洲山瘴遠樓高百尺海濤平  
清容軒裏攤書卷賸可懷人對月明

九日南安登高寄懷丁觀察兄弟

江城欲去更遲留，令節來登最上頭。  
九日嶺宜今日到，萬年人記昔年遊。  
酒思白社何時醉，詩愛藍田孰可酬。  
此夕肯教容易過，菊花猶是楚天秋。

篋中檢得尤悔菴見懷之作依韻却寄

長安遙望碧雲多，欲寄離情歎奈何。  
見說賦蒙天子賞，可能詞付雪兒歌。  
鳥雖已倦猶啼月，魚未成枯且過河。  
著作一時班馬在，不妨身著五湖蓑。



# 五馬山

路近韶陽好問津林巒此地獨嶙峋  
凌空蘿壁疑無路絕頂茅居不見人  
盡日煙雲長出雨非時花草尚留春  
安能荷鍤隨朱翌谷口偕耕號逸民

# 過迴龍山

風靜蒲帆遠望紆插天高壁翠何如山  
疑軒帝騎時返石是媧皇補後餘巖畔  
誰能逢異客洞中應自閉靈書  
空憐行役難停楫不見秦人愧老漁

彈子磯

碧嶂橫江似此稀，巨靈闢得是耶非。  
樹從崖腹石中出，鳥向山腰雲裏歸。  
樵客下看懸倒乳，舟人遙指挂斜暉。  
布帆南去秋風急，十里猶能見翠微。

觀音巖

百丈危峰倚碧天，遙看趺坐却依然。  
崖前石長千尋笋，海上波飄五色蓮。  
問法紺龍常夜至，聞聲白鳥向秋傳。  
閒雲亦有皈依性，日為金爐起篆烟。

泊佛山訪汪少參樊桐同年宅卷不得

離踪飄泊幾經年，倚權來尋益惘然。  
萬里還家何所賴，一官遺骨竟堪憐。  
孀妻有淚辭山郡，穉子無金買墓田。  
惆悵人琴多少恨，此情誰為表重泉。

王孝揚大將軍招集西墅

秋靜旗門卧綠沉，西園高譙愜幽尋。  
情多更覺銀箏好，坐密難辭玉笋深。  
燈影煖回羈客夢，月華清似主人心。  
也知意厚無拘束，一任樊川信口吟。

夜宿招隱堂憶石公題壁

遊倦梁園鬢已華  
避囂聊復聽楞伽  
鄉心得靜渾忘客  
歸夢無程忽到家  
地遠尚留前代樹  
春多先見隔年花  
遠公飛錫空相憶  
悵望瀛州阻海霞

長壽禪院次韻答元宗上人

愛入青山聽磬聲  
逢師物外動閒情  
茶瓜暫許同支遁  
婚嫁猶憐累向平  
貝葉影搖開士館  
墨花香滿化人城  
從今月下頻來往  
三癸亭前有姓名

至日旅中偶作用杜少陵句

年年至日長為客此歲蓬飄廐苑中步席花前貪地暖  
憑欄池上覺天空半窓梅萼橫霜影一鉢葵芽剪露叢  
遙憶廬山舊同社可能沽酒待陶公

至後一日梁藥亭招集六瑩堂分得八庚

不因人熱轉多情永日留賓坐欲盈香發自開新酒瓮  
調高如聽古琴聲冬殘碧草霜華淡春近黃梅月色清  
獨笑淳于偏泥飲未愁魚鑰下重城

遊五羊觀

琪樹蕭疎甲觀荒  
籃輿偶涉轉蒼茫  
人間那得千年鶴  
海上虛傳五色羊  
斷鈕寒鐘留古閣  
晚風斜日下空廊  
尉佗去後雄圖盡  
朝漢臺邊碧草長

夜泊紫雲洞

蓬飄何意更宵征  
月黑前山問水程  
火燼寒爐知夜永  
暖回孤帳覺冬晴  
炎方冰雪非常見  
遠道風波只自驚  
遙聽枕榔聲  
邏裏荒雞無力喚天明

夜泊天寧禪院

萬里蓬飄到海涯  
蕭齋夜宿自徘徊  
湖山已與人俱遠  
風雪如隨客共來  
一榻涼雲孤枕冷  
半牆斜月小窓開  
羅浮漸少梅花信  
何意談空得辨才

登七星巖

層陂過盡碧粼粼  
多少奇峯倚翠旻  
北斗有形山競爽  
南天無盡草長新  
烟霞興劇歸來日  
林壑緣賒病後身  
更欲乘風窮一目  
晚雲吹上白綸巾

端州道中望峽口積雪

蓬窓一夜動寒吟  
曉望千巖雪已深  
峰不向陽常皎潔  
雪如戀壑更蕭森  
祇因路折偏迷眼  
不奈身孤益感心  
賴有留賓戴安道  
何須回棹北山陰

邱社讌集遇柳州太守江眉瞻話舊

春水垂楊拂畫船  
江頭相送又經年  
一燈白石吟邊影  
萬里青樽別後緣  
子厚溪山爭似昔  
文通詞賦寄從前  
橫柑堂下聞輿誦  
歸到南雲向客傳



瀝湖舟泛

七星巖下漾揉藍偶泛扁舟勝自探  
嶺外霜風饒綠樹  
客中春色剩黃柑  
武陵未許遊人住  
輞水空將釣叟慚  
三十六陂秋故在  
相看寧不憶江南

玉屏峰看梅

百尺危峰倚碧虛  
憑高舒眺夕陽初  
雲空却見花爭放  
山靜還宜雪有餘  
洞口猿歸香縹緲  
山腰鶴下影蕭疎  
誰能更作羅浮夢  
么鳳橫斜墜玉蜍

夜偕愚公準菴及仲子看月

雲斂晴霄桂影斜移牀聊復傍檐牙老夫得月難忘酒  
客子臨風忽憶家夜半隣人歌白苧冬殘異國見黃花  
誰知一枕江南夢又聽空林舞曉鴉

贈宋維清

清霜瑟瑟鬢華寒長鋏由來未易彈十九人中猶作客  
七千里外為求官居貧未信從軍樂任俠偏嗟行路難  
漫道珊瑚空在手富春明月掛漁竿

客有問聽翁何義者書以答之

炎涼時態眼難明  
况復容將口舌爭  
萬事不須生計較  
一心惟合養和平  
洗桐書屋秋鳴鶴  
搓柳毬塲曉轉鶯  
更有翟公門外客  
任他來去不關情

又

牛馬從教任意呼  
醉人推罵莫相扶  
也知有進寧無退  
那見多賢遂少愚  
今古事當全合算  
行藏天已預為圖  
濁醪一盞詩千首  
若得閒心對海鳬

留村尚書招飲觀家劇即席紀事

碧幃紅蓮未易攀  
鄭莊迎客夜初閒  
席聯舊雨情偏洽  
筵敞高雲禮盡刪  
竟夕悲歡難自主  
一時頻笑若相關  
浣花獨有龍鍾叟  
扶拜何堪劍履間

初六夜宿二癸菴

為避塵囂就梵宮  
一宵清興許誰同  
四山綠淨天垂釜  
萬樹青低月偃弓  
嶺外春來寒已少  
湖邊波定影全空  
此時身世知何處  
擾擾槐安嘆轉蓬

登東江亭望硯洲懷古

直下牂牁勢不平蒼崖夾峙失縱橫天低絕壁雲無影  
水遶孤城浪有聲高寺寒泉來徃路空亭細雨古今情  
清風孝肅原千載一硯何由乃得名

元夜徐鳳池顧辛峰鄭愚公黃位北錢目天季  
偉公偕家觀莊武登同集石濂上人招隱堂  
分賦得回字

嶺外燒燈暖已回雁堂初啟集鄒枚陶潛愛酒詩千首

支遁逃禪茗一杯香界有人看皎月春城何處碾輕雷  
此中桃杏俱開遍消息江南未放梅

石公招諸同社集懷古樓分得八庚

忘機隨地好班荆獅座聊尋鷗鷺盟遠客何勞寄詩卷  
幽人多是愛鐘聲雲因戀岫常思靜雨欲妨花不肯晴  
盡日留連寧足計酒壚禪榻足平生

雨中

深坐攤書晝下簾午餘更覺客懷快滿懷山影暮雲合

一夜雨聲春水添香印每從長日冷酒杯偏憶故鄉甜  
傍人莫為逃禪怪支許由來塵共拈

尋朝漢臺遺跡

五羊城下草如茵欲訪遺臺跡久湮上客何來真漢使  
老夫原是舊秦人雄圖已盡珠江晚往事徒留錦石春  
惆悵函關千萬里亂山斜日少停輪

珠江春泛

木綿花發共他鄉極望羊城倚畫檣樹色曉籠山霧紫

江流春帶海潮黃陸生館廢金裝盡趙尉臺空玉鏡荒  
却恨奔濤方日夜梅花偏隔嶺頭香

送友人還江南

離亭芳草雜靡蕪客裡歌驪意轉孤紫陌飛花初過馬  
白門垂柳正啼烏往來路向東西別醉醒情因去住殊  
若到隋堤煩寄語郢州詩思滿東吳

和長白題畫不如樓

高樓百尺倚嵯峨賓客曾經此地過雲擁萬山開岳麓



天交一水遶牂牁嵐光自覺當簷滿秋色偏能入檻多  
不是柳州曾易播誰留勝跡在巖阿

酬蘭偶

多君雅志邁時人年少才高必有神問字偶然逢漫叟  
讀騷偏喜近逋臣花間詩卷吟深夜竹裏禪房過晚春  
待我荔枝同啖後倚門應得慰慈親

喜晴

一春簷溜動長嗟暫得雲開遇物華枕簟香清梅潤減

簾櫳陰破柳風斜  
林間買酒留看月  
葉底扶藜剩見花  
明日板橋青紵下  
王郎應更繫驕騶

題梅花泉卷子

西溪見說不尋常  
春到人間路渺茫  
萬樹冷雲晴帶月  
一泓寒雪靜浮香  
高人盡日攜筇杖  
幽客何年著草堂  
我欲移家更深處  
武陵雞犬未相妨

清明旅懷

養花天氣反如秋  
槐火初新賦遠游  
卧病豈能還止酒

思鄉何必定登樓  
七千路外魚書少  
廿四風前燕語愁  
却憶去年同上塚  
一杯猶得洒松楸

謁三忠祠

天水南奔祚已終  
成仁有賴見三忠  
魂歸燕市原非死  
力盡厓門氣未窮  
今古何人回劫數  
乾坤無地哭英雄  
蘋蘩欲薦空多慨  
雨歇荒祠吐白虹

壽孝揚王大將軍

嶺外南薰拂大旗  
封侯纔及棄襦時  
酬君志在長鳴劍

破敵書來正賭棋  
竟日自臨修竹帖  
三春人誦鬪茶詩  
遙知荀美方年少  
未暇登山覓五芝

又

鵲印光搖海甸安  
幾曾三十始登壇  
起居八座方春曉  
籌畫諸邊每夜闌  
孟珙談兵惟註易  
修期草檄未離鞍  
一時麟閣丹青畫  
猶作何郎傅粉看

和洗進士喬之見贈韻

老去難閒訪戴身  
五羊城下駐征輪  
豈期白社容逋叟

只合青山作外臣  
浪跡久為梅嶺客  
忘機常愛葛天民  
花開不厭同揮麈  
賒得醇醪未是貧

質既庸疎命尤蹇  
薄撫時揣分忝竊  
已多作自  
解詩

檢點平生信自然  
無才猶得荷蒼天  
春花秋月將三萬  
綠水青山舊二千  
婦勝劉伶能勸酒  
兒如通子好謀篇  
雖知結客黃金盡  
何用囊中定一錢

又

漫道衰年尚遠遊從來不解鎖眉頭未經海岳終堪恨  
纔見鶯花已欲留竟日逢人無俗語當時知己盡清流  
淒涼短髮江湖上賸有雲溪號醉侯

又

少年世事未關心悔別名山百慮侵讀史誤看循吏傳  
探懷空謝故人金青雲往苒難通路白髮蕭條已滿簪  
慚愧乾坤身老大文章空自望知音

孤踪萬里五夜百憂交集旅懷率然成詠作自

述詩

也知磨蝎困孤臣豈謂無官虐更頻  
八口何嘗逢稔歲一椽猶是共他人  
酒因賒久難謀醉篋為搜空任惹塵  
說向傍人應不信老夫原自恥言貧

又

兩年湖海信全稀未有關心苦憶歸  
莊舄已衰家更遠彥升猶在子無衣  
奴憂多餒常求去友識忘炊不告饑  
頑鈍獨憐無所事一編時掩客中扉

又

不是雲霄寄問疎從來懶作玉京書  
剩將朽櫪留齋馬賣到殘編少蠹魚  
尚有三喪須解棹全無一頃待揮鋤  
買山自感襄陽意但恐山中累有餘

鮑爾先招集片雪堂小飲

同是高陽舊酒徒有誰能似叔牙無  
歌殘花月三千曲寫盡雲山十萬圖  
庭樹手栽同漢叟滄桑眼見笑麻姑  
相逢今日珠江上獨為知心倒玉壺



維清攜尊坐月

嶺南秋半尚炎熏客舍追涼載酒勤  
萬里鄉心懸似月  
三更人影靜于雲  
雞頭滿把珠光滑  
龍目登盤玉乳分  
如此清宵良不易  
遲歸應為惜離羣

端州贈偉公

南天秋半暑初微  
一片孤帆去若飛  
彈鋏耻為賓館嘆  
叩門因乞父喪歸  
熟思生計惟開卷  
看盡人情好閉扉  
我欲掉頭從此別  
饑來猶有北山薇

家留村大司馬招同諸子讌集錫祉堂兼送電

發歸里用其原韻

油幢高建海天雄  
清夜留賓有上公  
筵敞氍毹歌扇碧  
杯浮琥珀燭花紅  
千山粵嶠吟莊舄  
一曲江南憶妙隆  
幾度送歸歸未得  
慣催鄉思是秋風

依韻奉酬家留村制府

汗漫天涯已隔年  
尚書高誼上秋煙  
班荆屢入三公府  
種豆渾忘二頃田  
自昔心期旌白水  
從來身世任蒼天

一人知我惟宗袞更乞誰家買字錢

端州贈鄭珠江太史

書帶新抽砌草痕玉堂歸養掩衡門鄉鄰罕識先生面  
菽水常沾聖主恩經歲避人尋好句有時留客共清樽  
投交最喜心期愜古道於今誰與論

端州送家青壇給諫還朝

未歸常是送人歸秋到河梁捲葛衣劍佩還朝聲自好  
金裝滿橐計原違顧教風采同中復始信文章似少微

贈別殷勤持一硯染毫應不負綸扉

泊舟禪山別廊無傲

歸心日夜肯流連為訪高齋一繫船人已忘情何有病  
客來無語莫談禪秋窻試茗燒紅葉午鉢分餐煮白蓮  
從此長沙徒惆望九疑晴綠隔湘烟

留別丁翁和尚即次見送原韻

秋半分江暑未殘片帆斜掛夕陽看浮杯送客君非易  
垂橐還家我正難世事明于三夜月人情險似萬重灘

相期有約歸黃海莫惜珊瑚作釣竿

了翁和尚同偉公蘭偶及家武登送別禪山舟

中望月分韻

嶺南歸雁羽難留追送澄江賦遠遊與子暫同千里月  
為誰猶欠一分秋碧天雨過雲偏盡翠渚風清露未收  
不醉今朝應未忍關河明日思悠悠

韶陽用許郢州韻

西樓無復舞輕羅空記殘碑立桂河百粵江山茲地好

三秋詞賦古人多斜陽不斷孤帆影遠水重聞倚棹歌  
從此蓼花楓葉外洞庭明月照曾波

宿良田

暫住籃輿息倦夫板牀土鏗亂茅鋪殘燈弄壁爭鼯鼠  
細雨連山叫鷓鴣樵鼓幾聲驚短夢征衫一幅老長途  
人生何事同桃梗欲畫瀟湘泛月圖

耒陽懷古

金州城下來江濱細雨孤帆悵昔聞王佐耒堪終百里

帝圖寧許作三分漢家霸業留殘壘杜曲詩篇哭斷雲  
今日木蘭船上酒一杯應不為湘君

望嶽

一棹沿湘九面分竭來蒼翠散朝氛人言上下不同雨  
我見高低無盡雲煨芋地鑪誰復在采芝石室客常聞  
安能直上芙蓉頂徧讀朱陵古篆文

酬贈趙又裕司馬

碧澗堂畔惜離羣十七年來始見君往事已同苔上水

舊遊今聚岳邊雲青峰數點秋聞瑟白社三更夜論文  
方外誰人似司馬可能張楚用吾軍

次韻酬華容徐荊菴明府

扉掩都亭晝懶開一朝車轍破莓苔高臺事往雄風散  
曲巷情多舊雨來每嘆龔黃皆妄語終輸屈宋有奇才  
秋晴岳麓猶堪訪倒載何辭爛醉陪

遊嶽麓書院偕長白仲子同賦

寫盡瀟湘聽雨圖何來杲日映菰蒲天開宿霧招遊客



地許名山屬大儒，鳥篆尚能存禹跡。  
龍宮空自鎖仙都，橫經往事知何在。  
欲訪湖南舊講徒。

又

亂後山川竟若何，此間遺構幸差我。  
千秋正席朱元晦，一片殘碑李泰和。  
衡嶽烟霞逢霽少，湘江風物過秋多。  
夕陽好處偏懷古，不獨登臨興未磨。

李育九守戎招飲即席賦贈

玄髮辭家氣激昂，白頭相遇坐熊湘。  
三千里外共樽酒，

十七年來老戰場紅豆歌搖鴉背月黃花香點雁頭霜  
相期空有尋真約魚蒲雲深石逕蒼

題辰六署中雲山湧坐樓

官齋無異草玄亭高閣嵯峨對列屏四野雲光浮檻碧  
萬峯煙樹入城青元龍孤榻書常滿巫馬單車轍暫停  
倚盡夕陽應自好知君一嘯破蒼冥

又

為政心閒身乃閒此中誰許共躋攀能清不愧湘江月

愛靜常看岳麓山丘壑自當功令外乾坤多在醉吟間  
公餘試檢雲煙課七十二峯羅翠鬟

登見岳樓次辰六韻

候轉吹葭霽景融偶經巖邑訪民風城頭不斷秋煙綠  
林表初看夕照紅迴雁千尋長隱隱離鴻幾日自怱怱  
憑欄共指煙深處屈宋精靈在此中

又

桃花江水遶城邊城上樓成甫四年撫字誰知當亂後

登臨同喜在春前，頻教白雪留詩句。  
為有青山費酒錢，天際遙看峯个个。  
白雲飛盡翠還連。

益陽至日仍用杜句

年年至日長為客，客裏今年畧似家。  
閑叔累人寧易飽，阮公懷古不勝嗟。  
黃牛水遠灘聲小，白鹿山高樹影斜。  
何處倚樓同有夢，隋橋明月故宮花。

過黃陵廟

鷓鴣聲裏倚蘭舟，帝子遺踪此處留。  
粧就湖山三萬頃，

啼殘烟雨幾千秋青楓葉冷鸞旗出斑竹痕深雁柱流  
一酌椒漿寒日晚蒼雲隱隱隔巴丘

黃鶴樓

天地寥寥賦遠遊此間樓湧大江浮濤聲直下三千里  
雲氣遙連十五州霞表仙踪疑遠鶴河邊客舫泛羣鷗  
那堪陵谷無常處鸚鵡難容碧草秋

又

黃鶴磯頭有所思檻前帆帶夕陽遲當年呂叟曾吹笛

何處崔郎更賦詩  
夾岼江城多事後  
倚欄山水欲歸時  
楚王宮闕荆榛裏  
只許朝雲暮雨知

歸興

李家門戶任如龍  
歸去聊為食蓼蟲  
天下有誰思舊雨  
人間何處哭秋風  
短衣半夜青雲外  
長笛一聲滄海東  
與爾望衡真不遠  
玉缸春酒蠟花紅

九月六日偕周範葉劉季英朱素臣舒奕蕃家  
大章小集克敏堂分韻

豈少侯家玳瑁筵舞衫歌扇夜留連  
那堪湖海皆相得同在風塵不受憐  
授簡更當明月下狂吟都在菊花前  
藥欄竟日堪乘興粗糲何妨共百年

又

離索寧殊在遠郊多君有約過蓬茅  
相看快意非常客可與論心即舊交  
盡却笙簫吹木葉雜供魚蟹剪秋茭  
何堪更賦江淹別撚斷雲鞭細柳梢

夜集種字林聽雨分賦

間中相得有詩豪  
晚向牆頭過濁醪  
夜色一燈深竹樹  
雨聲三徑驟風濤  
消磨往事蘇門嘯  
潦倒餘生楚國騷  
莫更縱談塵外事  
卧龍躍馬亦徒勞

集種字林試紫霞茶東栗亭

桐花滿地暑猶寒  
雨後聞歌行路難  
遠客尋君唯有夢  
才人過主不須官  
紫陽舊業吹簫坐  
白下高樓倚棹看  
許我名篇應計日  
亭前刻遍翠琅玕

武徵攜樽過種字林坐月分韻



結夏墻東少往還為君攜具啟柴關  
雨過殘日初宜酒  
月到深林似在山  
入饌蟹螯秋信早  
垂簷馬乳夜光間  
輞川更有南城約  
紅藕花香綠一灣

七夕泛舟為盧賓三補賀花燭立秋前一日

浣罷溪紗出若耶  
西陵油壁正同車  
移來江左文章樹  
共放河邊吉慶花  
白帝明朝秋日好  
黃姑今夜漏偏賒  
臨窻試取冰絃弄  
應笑閨中有伯牙

七夕送念昔歸楚

年時記泛洞庭舟今日聞君賦遠遊天上牽牛猶有別  
人間洗馬莫須愁綠萍分影移歌棹紅藕吹香入酒甌  
若到故鄉休久戀瀟湘蘭杜不宜秋

重陽後一日哭扶風君墓下

華表重歸舊業荒煙霜滿目總悲涼已無金屋藏春色  
但有青山送夕陽萬里夢中來倩女九秋江上哭蕭娘  
欲知多少傷心事一草墳頭一斷腸

又

三年真悔海南遊一訣終難到白頭失水鰥魚原不寐  
覆巢歸燕竟誰投言關骨肉應難吐淚出肝脾未易收  
自是幻緣君莫恨人間華屋總山丘

虎丘拜東萊二姜先生祠

東海當年說二難雄文高節震朝端書將正史心俱壯  
讀盡離騷淚未乾秋色已從吳市老斜陽猶作敬亭看  
誰家兄弟能如此晞髮泉臺覓舊冠

又

霜落空山草不春  
荒堦倚杖拜遺臣  
龍門酌酒同攜手  
虎闕攀裾肯顧身  
家國一時多難日  
江湖千古未歸人  
三橋華桷應非少  
誰共裴公可結鄰

次韻答余廣霞

孤影誰憐太瘦生  
老年羞更說才名  
大人不作彈冠夢  
小婦難為叩缶聲  
兩載暮雲懷粵嶺  
一番秋雨過吳城  
幾宵展轉頻推枕  
聽徹蝦蟇欲斷更

又

路歧寧復問高低夢破方知醒亦迷只合行藏同虎鼠  
誰將得失問蟲雞相逢那有三生笑欲去翻為半面啼  
始信南華原不悞從來物我自須齊

贈濤月

閒身愛向靜中安小阮相逢意更歡自是管寧猶皂帽  
何須賀監不黃冠花于市遠宜長對樹比鄰多莫借看  
大洞經完晴月上一樽初熟共盤桓

江陰陸天濤明府招集署齋

秋盡澄江月影寒  
南軒煮酒坐更闌  
從他別夢長千里  
如此才名始一官  
秋水共知為吏好  
著書猶復向人看  
城頭山色多飛鳥  
誰信金門索米難

又

訪戴何來緊短槎  
士龍為政俗無譁  
官齋地隙常鋤菜  
海國風清好種花  
月魄正圓人對酒  
秋心欲動客思家  
誰知未了西牕話  
街鼓聲聲報曉衙

重游韓園喜晤爾鉉

重過玉映舊時堂好友相看鬢總蒼  
百歲欲同梅樹古一年多為菊花忙  
聞香未及開山館謀醉何曾計客裝  
三十餘年清夢在此時能不倒千觴

立冬前一日同集生玉亭遊君山登望江樓  
層波渺渺水颼颼乘興籃輿到上頭  
風月可憐人自老江山無恙客重游  
烏鴉向夕爭歸曉白雁明朝又送秋  
望裏金焦深不見倚欄誰更說歸舟

送盧賓三攜家歸皖江

漠漠彤雲雪乍晴蒲帆十幅出蕪城故人正作中年別  
才子偏高大厯名畫槳月明橫軫夜玉簫風和扣舷聲  
皖江舊是英雄地懷古應知有遠情

俞錦泉招觀女劇漫賦

十二樓中度曼聲玉輕金艷影縱橫主人但謂清觴慢  
客子翻嫌絳蠟明休喚奈何須爛醉若為看去莫多情  
兩行紅粉重相笑猶記顛狂是此生

為史淑時悼亡



奔月還星豈易知百年歡愛一年時  
好難都記翻成恨情不堪憐並作癡  
綵帖繡餘拋斷線青編讀後印殘脂  
巫山宋玉何能賦雲雨荒唐自可疑

又

誰畫劉家列女圖當年挽鹿事原殊  
從夫自信非餘子作婦真難況兩姑  
艷似名花惟有影嬌如弱絮豈能扶  
海山浪說仙人在比翼終憐彩鳳徂

又

纔開梔子贈同心  
夏電俄將並蒂侵  
世上忽傳廬女盃  
閨中欲碎伯牙琴  
青山有恨能埋玉  
紅粉無緣可鑄金  
惆悵竹西亭下水  
一回揮淚一回深

又

落葉哀蟬盡可傷  
返魂何處訪稠桑  
愁如碧草初經雨  
瘦比黃花竟萎霜  
多慧只教心更苦  
無才或得命能長  
祇今燈下多情淚  
猶點安仁白練裳

雜感詩和上若韻

三十首

摩天漸陸一秋鴻物我由來事不同作吏漫誇龔北海  
著書曾學董膠東那知工拙分齊瑟莫為存亡問楚弓  
幾畝黃花三徑竹儘教殘日付樽中

又

癖統相傳早得封寧知身襍酒家傭饑多懶向屠門過  
吟苦常從飯顆逢誰使老人為漢客徒因嬌女學吳儂  
時時運甓成何濟猶阻天關第八重

又

舊築愁城漸受降三春花氣撲瑤釭雕龍此日人無幾  
捫蝨當年客少雙桐帽可能登廣席竹燈嘗自照幽牕  
宵教一曲琵琶淚彈向青山月滿江

又

行行老驥敢嫌遲才子曾稱杜牧之廟食久應賒遠志  
水嬉今已負前期事當已去寧堪憶人到將衰總不宜  
趙壹囊中無別物頻年惟貯浣花詩

又

中條山下駐餘暉，惟恐人過早閉扉。  
吉了也知非得已，杜鵑常喚不如歸。  
身無玉壘桑千樹，手種金城柳十圍。  
縱有綈袍那得贈，秋來欲剪芰荷衣。

又

欲取珊瑚網，自疎行吟空。自笑三閭東，  
臯有意聊謀秣。北闕無媒且灌蔬，  
乾蠹豈能成脉望。殘羹爭得化王餘，  
常憐鄭叟無先見。臣老方知壯弗如。

又

閒行曲逕數花鬚一任人催九月租眼縱欲青眸合洗  
髮無堪白血難餘雲深不覺離鴻斷天遠誰知立鶴孤  
從此買將三尺棹五湖飛雪舞黃蘆

又

幾疊青峰對碧溪移家新住竹林西忘憂時取三升醉  
避俗常將一卷攜只擬安身如尺蠖寧堪斷尾學犧雞  
飯餘偶得貧簞句欲寄山僧手自題

又

小屋渾如畫舫齋新年漸覺賞心諧客來看竹橫棕拂  
兒為澆花濕笋鞋得醉應知天可問無憂寧有地堪埋  
絕交讀罷劉生論且與山中鹿豕儕

又

九衢終日起纖埃獨把藜牀上嘯臺紈扇驚秋藏皎月  
香車入夜碾輕雷身閒即辦蘭和菊性拙寧思棘與槐  
最羨江頭雙白鳥一回飛去又飛來

又

四海茫茫孰問津，幾多踪跡笑梁陳。  
芙蓉閣下回珠勒，楊柳堤邊走畫輪。  
俯仰未能同熱客，古今誰解作閒人。  
行春莫向江頭去，丞相從來易得嗔。

又

朝衣侍史久無熏，翠被閒來擁鄂君。  
常為寒梅成艷曲，偶因修竹作彈文。  
懶挑燈穗三更月，靜看香鬟一縷雲。  
客過莫教談往事，已無臧否不須聞。

又



庚信園中種合昏繞籬花竹閉閒門落將桐葉雲生影  
開到梅花月有痕愛酒只因能換骨聞歌輒欲為銷魂  
吾儕原少封侯相但合彈琴隱陸渾

又

陶泓毛穎日相歡豈料人間有萬端美女何嫌遮翠鈿  
神仙又見泣金盤馬周向後偏宜醉范叔平生合耐寒  
慚愧東風無氣力等閒吹得百花殘

又

路逢九折漫躋攀家住隋堤近小山黃老未須求道去  
紅兒聊共踏歌還故交多是人千里寒士安能屋萬間  
最笑勞生難暫歇畫船日夜過萸灣

又

離騷一帙度年年賸有文園賣賦錢但得種花兼釀酒  
那知成佛更生天蒲桃上架三更雨楊柳搓毬二月煙  
莫怪比來生計少癡頑原不許人憐

又

百慮皆從酒畔銷，渴羌從此不稱姚。  
任教老去頻呼馬，誰信童時早拾貂。  
山月自迎廬阜衲，溪風能送剡川樵。  
舉頭便見雲霄近，偏是人如萬里遙。

又

自分生來似苦匏，巾箱嘗自取書鈔。  
難求野老三年艾，擬結山僧一把茅。  
鼓到過時帆自轉，瑟當彈處柱難膠。  
千秋世事原無定，揚子寧須作解嘲。

又

歷觀前事愛東臯螺贏當前笑二豪且待數畦供菽麥  
安能一斛獻蒲萄饑烏豈得頭生角高鵠何須背有毛  
休怪臨餐還輟食爨成應自惜薪勞

又

不用臨風感慨多此中猶可免風波右軍壟下人曾誓  
左相門前客懶過劍擊長虹須痛飲簫吹明月好清歌  
桂花寂寂青天老未得無情奈若何

又

日轉空庭樹影斜更無塵夢到東華  
愛看仙婦奔明月却許迂生號幻霞  
雪後花開香玉蕊春來草放鬱金芽  
懸知富貴皆時命莫羨高軒疊鼓笳

又

閒榻蘭亭寫硬黃不煩宮紙賜銀光  
小紅歌罷聲還啞太白吟成意欲狂  
幸得林棲同謝燕肯教芻牧任梁鴛  
楞嚴一卷心香熟便是餘生却老方

又

懸車久擬罷宵征見說彈冠夢亦驚有累但須偕適越  
無才原不望登瀛尚留習氣為詞客未免機心見酒兵  
五畝閒桑春雨足教兒且共學歸耕

又

晴窓曉日下丹櫺笑殺淳于尚未醒片月屢經浮世白  
數峯猶對故人青前年踏雪游衡麓此日吟秋憶洞庭  
勝負何緣爭未了博經真欲燬撩零

又

腰圍漸減帶難勝  
豈料閒情日更增  
賦就大言酬宋絹  
詩成小字寫吳綾  
夜如紫鳳真堪笑  
坐有蒼蠅信可憎  
龍性獨憐馴未盡  
醉中豪氣欲飛騰

又

漸欲同為造物游  
半生疎放恥營求  
容頭不礙高檐帽  
煖體偏宜大布裘  
綠酒有情能過日  
黃花無恙可經秋  
逍遙便得江頭住  
敢負芙蓉幾隻鷗

又

種得梅花綠水潯雖無萬壑是山陰每聞客到偏多喜  
惟恐人知欲更深學道漸空榮辱想作禪先斷去來心  
自從廬岳聞鐘後一見桃花悟至今

又

霜花著鬢白毵毵樗櫟年來恐不堪幸值兩朝文漸盛  
欣逢七國亂初戡垂楊曉聽雙棲鳥香草春縑五色蠶  
自是放懷應便是八公從古在淮南

又



朝朝看奕向疎簾紫棧成灰手更添  
蕙草雪消香滿逕  
桐花風定月侵檐文章似我無餘錦  
機杼如人獨比縑  
坦率尚虞吾道隘袁公何必事矜嚴

又

端居原未遠塵凡日下經籤已滿函  
自許野人甘雪竇  
不知朝事愛氷銜春生蔣逕花遮檻  
秋到淮山桂滿崑  
葛被練裳時偃仰也應勝似白涼衫

丙寅元旦

畫燭熒熒看曉粧  
閨人相見道勝常  
耐寒老子初圍火  
學拜頑孫欲開堂  
雪色正添窓外凍  
晴光偏送酒觥香  
也知增歲原為減  
猶喜吟髯未盡霜

寄懷家留村司馬

憶昨羚羊峽裏遊  
官齋剪燭意綢繆  
辭家空負三生月

余入粵後馬  
姬卒於吳門  
度嶺真逢兩歲秋  
余以癸亥九日度庾嶺  
甲子九日出嶺而歸

交誼如雲知我困  
臣心似水為人謀  
栽桑種秫煩深算

一飽應知未易酬

又

多君意氣勝襄陽德水亭前語未忘佩劍只因仍適粵

讀騷翻悔悞浮湘

余至楚當事頗以衆人相待

人情閱後心偏感世

路分時思轉長遙望南樓賓從在可曾對月憶中郎

書陳椒峰冊寄留村

當代論交孰淺深偏於將伯感知音長懷海國春雲誼  
未改泉亭夜月心赤社銘鐘君振古青門荷插我從今  
閒尋舊好煩傳語霧裏看花欲廢吟

小飲朱西柯四本堂

西柯不見輒相思步屨經過未肯遲偶出尋師叅玉板  
還來邀客鱸銀絲雪晴修竹新成徑春到垂楊漸軟時  
為覓厨娘新樣法與君重約賭金卮

題畢正持松濤閣著書圖

萬壑清風鳥道紆倚欄常有綠雲鋪身如鶴立詩同瘦  
逕繞龍鱗歲久逋百尺未曾容客上一編應自與人殊  
知君避俗非無意不羨秦家五大夫

書雲招飲看花時庭前芍藥鶯粟酴醾爭艷即

席步蛟門韻

好客常時不掩扉南園櫻笋正初肥香非一種蜂難定  
艷有千重蝶競飛錦瑟橫時名士醉彩毫搖處美人圍  
不因置驛多佳興那得脂痕亂染衣

黃孝昭貰酒過飲同諧石淑時正持分韻得八

庚

清簾疎簾一榻橫南軒久已廢將迎人因無意成佳會

酒為能賒得快情萱草開時看戲蝶桐花香裏聽啼鶯  
不緣較字頻燒燭那得留君待月明

送孝昭游武林再得十灰

見說西陵花更栽褰裳無計幾徘徊忽聞詩酒催行去  
益令湖山入夢來油壁漫尋蘇小約金裝長憶陸生才  
竹西五月芙蓉好分付蒲帆緩緩開

送藏山和尚還中泠時以梅花家語見示并惠

新詩依韻答之

空谷何來得好音  
錫飛今見下東林  
因尋老樹穿幽徑  
欲共寒花說素心  
有句直憐雲未靜  
無言應共雪還深  
西窓夜雨原堪聽  
拂袖誰教返碧岑

又

歲寒寧易得知音  
一卷傳來是道林  
往日煙霜曾著眼  
此時冰雪有同心  
花將解語偏能淡  
詩到難名更自深  
我在羅浮頗相憶  
獨慚佳句付仙岑

幽居書事

幽居幸遠軟塵紅  
永晝耽閒卧一弓  
移石且留蕉聽雨  
推窗先借樹占風  
吟殘轉覺蟬聲鬧  
夢短徒尋蟻穴空  
納納乾坤無一事  
瘦筇長倚夕陽中

又

九夏何曾更著冠  
微颺繞送意先歡  
閒人合在長閒地  
熱客由他愛熱官  
時雨隴頭秧五葉  
斜陽屋角竹千竿  
山妻却怪多吟癖  
煮豆頻勞勸晚餐

又



蕭蕭木榻倩龜支一嘯高齋墜枕時引睡不辭河朔飲  
怕愁常掩杜陵詩書因悞信名終鈍人以誠求計總癡  
彈指兩年成七十也知學道尚非遲

又

小亭真似築滄浪晞髮籬邊受晚涼足畏陰巖常引疾  
眼羞輕薄未嫌盲桐花帶露香飄檻笋籜搖風影過墻  
擬作槐芽聊一飽東田新麥麪如霜

又

世事升沉信夙緣生涯何事不由天經籤有課晨先起  
文字多逋夜不眠老友為謀栽秫地貧交常助買花錢  
支頤竟日無來往坐看山爐裊篆烟

又

曲巷泥深掩戶荆老人畏暑澹無縈經旬已見苔千箇  
昨夜又添蓮一莖急雨更拖殘日出斷雲還作亂山橫  
西隣有客遲何事空費虛堂煮酒聲

又

茂陵莫擬漢相如且就城東水竹居  
懶極那知身外事  
倦來時墮手中書  
敢期赤社衣冠偉  
漸喜青山筆札疎  
却笑楊郎空耳熱  
烏烏扣缶獨何歟

又

錦石船回欲養慵  
夢中無復景陽鐘  
一椽已可容聾叟  
十畝何妨號老農  
引分自安心易足  
感知嘗恐報無從  
瀝湖隄上籃輿軟  
遙念芙蓉七箇峯

又

老驥徒懷萬里心  
山麋終是愛長林  
簪餘短髮猶非老  
選徧名山總未深  
天上有人搖羽扇  
市中何用碎胡琴  
一盃炊熟長腰米  
莫問浮生歲月侵

又

過從莫問笑瓜牛  
小有軒窓致足幽  
九月種花堪供酒  
三更對月最宜秋  
身如白鶴難乘轡  
心似蒼鷹已脫鞵  
從此更饒煙水計  
輕肥寧共小兒謀

偶然作

得意失意非所知出戶入戶常遲遲一盤蒸桃紅琥珀  
六尺竹簟黃琉璃飡飯難為老妻勸啼笑時被兒童欺  
百年鼎鼎亦何速躍馬卧龍安足奇

一枝

一枝聊學鳥安巢棋酒春來漸欲拋聞見每嗟新事異  
過從漸少舊時交輕絺稱體忘宮錦野藪登盤勝美肴  
只有晴蟾無世態年年常為到林梢

月下觀蓮

玉沼田田倚綠雲  
露華清夜暗香聞  
今年正得花三品  
此地原宜月二分  
涼影連宵懸雀鏡  
幽芬到曉襲羊裙  
嫦娥自惜紅衣冷  
欲為湘君下素雯

壽湯惕庵夫子八十

紫氣遙瞻感倍深  
當年曾得薦鳴琴  
歲時自老懷人意  
陵谷難移知己心  
碩果久留寧用採  
神芝親種不須尋  
釣璜未是磻溪願  
一曲南飛且共吟

又

鳩杖娑娑引鳳毛  
新秋棋墅樂偏饒  
客經盱水方知學  
人與廬山相並高  
河岳日星千古在  
臯夔巢許一身遭  
侯芭夢到揚亭遠  
欲寄蓬萊換骨膠

金山和畢正持韻時方發帑修寺

一棹橫趨萬馬奔  
多君乘興探雲根  
直臨中峙蓮花影  
俯躡交流竹箭痕  
聖主正思天有柱  
神人聊障海為門  
蛟龍久卧知難穩  
莫把寒鐘震曉昏

和伯御姪游平山紅橋四首

經旬不出只科頭  
羨爾乘槎作勝遊  
棋墅千家圍曲岫  
酒爐一帶倚芳洲  
蘋開畫鷁依青嶂  
花夾垂虹枕碧流  
吟得新詩滿懷袖  
可堪風雨一庭秋

又

歌吹猶聞滿大堤  
玉簫金管郡城西  
綠楊影密江蟬噪  
紅藕香深水鳥啼  
此地隋樓曾共醉  
誰人蠻榼更同攜  
惟憐清夜飛螢地  
只剩淒淒碧草齊

又



珠簾畫棟壓人寰莫問茱萸更幾灣自有醉翁凭畫檻  
却教詞客重青山春風別後龍蛇杳明月分來鷗鷺閒  
最是荷花獨滿把誰能邀客更重攀

又

行行策杖捨輕航此地高樓半夕陽千古文章時已遠  
一簾風月夜初涼山光自足留人賞水調寧關故國亡  
滿地秋陰凝眺遠垂楊猶自帶崑岡

鶴問來自秋浦喜而有作

羅刹磯頭木葉紅蒲帆何意掛秋風官無民社能輕出  
老愛琴樽喜暫同浮世暗銷離別內故人多在寂寥中  
西窓一話非容易盡讀新篇意未窮

九日集玉粟稱言齋時鶴問至自秋浦分得支  
蒸二韻

堦前流水綠差差正是天涯木落時烏榜乍歸江上客  
黃花初放酒邊枝知交漸少原須重譙笑無多最可思  
盡日疎簾湘簟靜不妨同看謝家棋

又

興發何須折簡曾偶聞高會拂蒼藤花前聚首人無恙  
月下掀髯我尚能就菊巧徵詩一字卷荷狂吸酒三升  
吾儕亦信非麋鹿短髮空憐歲序增

九日次書雲韻

江山處處有樓臺秋氣偏從此地來千古傷心楊柳笛  
一時到口菊花杯迷花黃葉寒烟冷隔岼青峰晚照開  
惆悵昔人多不見步兵長嘯首頻回

和宋長白見寄韻

何日招攜共入林一篇相寄似鳴琴  
嶺梅湘竹同幽夢碧水遙山憶遠尋  
逋叟楮冠棲北郭故人綵筆重南金  
分明丁卯橋邊句贏得空齋夜夜吟

初四日蛟門招同書雲志菴眉樞集見山樓次

蛟門原韻

高齋花事乍逢春踏雪過從興倍新  
幸得烟雲娛冷眼肯將車馬負閒身  
無多畧似睢陽老有約還同雒下人

堂上笑他批紙尾白頭辛苦為絲綸

元宵後二日小集和蛟門韻

烟月能留漸老身燒燈又見一年新  
美人意重來清夜詞客情多為早春  
縱酒不嫌添麪友愛梅長欲護花神  
先歸豈是無佳興灞上愁逢醉尉嗔

哭豹人二首

垂老空思對酒期那知締好便傷離  
同言詞客常天寶豈信徵君在義熙  
百歲才名貧病裏兩家兒女涕洟時

寢門為位非常事可奈山陽笛又吹

又

年來耆舊盡淪亡屈指何期到漑堂  
竒字欲留周汲冢高人誰復魯靈光  
龍蛇有幾時堪惜猿鶴無多事可傷  
想爾凌雲應一笑莊生齊物等彭殤

寄辰六

自愧冰清樂令般逢君驅馬入秦關  
欲窺清漢無多路偶抹微雲是此山  
玉鏡早偕仙月皎金門長笑歲星頑

祇緣文字成親好漫擬浮槎到碧灣

又

去年一棹訪雲蘿正值烹雌百里歌芳草未歸寒夢遠  
垂楊偏似旅愁多窮途授服裁番褐弱女支餐賣越羅  
興盡不堪逢歲晏滿江風雪獨披蓑

書雲招集種松軒看垂絲海棠步蛟門韻

燕燕營巢未乳時輕紅初向畫檐垂攜觴最愛粧能淺  
燒燭還憐看已遲態欲難勝翻似醉情緣不斷更成絲

碧雞坊下顛狂叟無句堪酬絳雪枝

集種松軒看梨花

李艷桃嬌百感生梨花開處更含情相看但覺塵心淨  
不意能教病眼明壓帽有風偏婀娜洗粧無雨更輕盈  
多君買得青旗酒月黑何嫌到五更

二月廿七日武徵東湖彥昭夜集薊薌舸分韻

時西柯以事不至

小院東風放海棠濁醪深夜過隣牆忘憂只合歸吟社



投老偏宜入醉鄉三月烟花半寒暖一宵燈火各閒忙  
清明節後秋千冷不飲還應負艷陽

偶成

投老偏宜向薜蘿春來幽興晚偏多偶聞夜雨思分菊  
自引山泉待放荷愛靜獨為諸葛卧談禪惟許懶融過  
竹籬茅舍平生事何必曾逢春夢婆

喜霜溪移家至自白門

交深車笠共寒溫浮世絲叟豈足論解組久知身有數

談詩今喜舌猶存紅牙點拍詞千首白髮燒燈酒一尊  
曲巷莫辭愁雨滑從來風義重彝門

懷蒲公和尚

問法常思訪道林我來君去費幽尋始知六代名山地  
不了三秋上士心翠壁摩雲堪縱眺清江著月好閒吟  
如何韓信城遙路艸沒蒲團未布金

次感懷韻

浮家擬向五湖東荏苒年華付斷蓬獨卧敢希高士雪

遠遊空憶大王風  
心隨芳草三春後  
身老垂楊六代中  
惆悵鳴琴長在篋  
誰能揮手送歸鴻

贈陳婁東

蕭齋六月葛衣單  
客況於今且暫寬  
自笑酒狂猶未減  
却憐詩瘦更相看  
思君那得過蓬戶  
似我都忘著楮冠  
却笑玉山渾欲倒  
也隨陶令兩眉攢

贈東樞弟

曾與天公上素箋  
當時名字共聯翩  
嗟予白雪頭先老

愛爾青雲志更堅梅里著書秋偃仰蕭齋賭酒夜留連  
唾壺欲缺君休恨千里終當早著鞭

偶讀呂居仁夜夜蒲團坐五更之句漫作二首  
夜夜蒲團坐五更欲除豪氣學無生秋窮最與禪心合  
人靜偏教道念成呼婢不妨驚鶴夢求衣寧復候雞鳴  
何如昔日趨朝早金馬門前理佩聲

又

夜夜蒲團坐五更而今萬事不關情也知來去非真相

便是虛空亦強名才說幻緣應是幻若教明鏡向誰明  
六如已是非非想况復蟲雞那用爭

澄江九日作

清秋重繫剡溪船借榻蕭齋意惘然歲序催人還九日  
江山別我已三年黃花插帽非吾土紅粉持觴總各天  
笑殺白衣人不見憑誰酬贈酒家錢

澄江喜晤昉思過飲玩月

才記分衿各幾年故鄉相見益歡然秋殘忽得連宵月

寒近難逢此夜天  
爛醉共傾桑落酒  
朗吟同研衍波牋  
紅么白苧平生好  
願譜新聲付寶絃

喜廣霞喬梓自吳門震修自毘陵至偕趙翔九

徐石霞鄧少廣諸同人小飲分韻

倦游無事掩禪關  
正憶停雲感慨間  
月下忽逢雙屐到  
花前猶共一杯閒  
晴開積雨楓初赤  
暖過重陽菊有斑  
同是羈心在搖落  
何堪不醉輒思還

同廣霞飲石霞齋頭分韻

清立幽栖似陸渾情深舊雨為開樽霜凝古樹紅連屋  
秋老遙山翠入門北海千觴隨客倒南州一榻許人溫  
何時得遂攜家約盡出奇文剪燭論

夜讀昉思諸樂府題贈

江城橘柚欲寒天邨夜挑燈拂寶絃信是讀騷能協律  
豈知奉勅有屯田詞堪洒血寧惟難事到傷心定可傳  
我是青衫舊司馬為君焚硯百花前

又

菊部於今少輩行  
高音麗節譜宮商  
一時側目看才子  
幾處低鬟拜粉郎  
筆架珊瑚原有數  
箏調玳瑁信非常  
漢皇正想凌雲客  
何事猶虛七寶牀

移居皆可堂  
喜翔九石霞殿  
臣見過共用遷字  
高齋遠在水雲邊  
一襆攜來榻更遷  
略涉秋冬時已暮  
為貪朋好地須偏  
遠池並種花兄弟  
竟夕長淹酒聖賢  
見說張衡能作賦  
日同觴咏意悠然


登君山



霜染柔嵐色更新扶筇還共步嶙峋地因朱履仍留姓  
客有銀樽豈道貧雪色滿天催去棹江聲一路送歸人  
長松翠竹重相見多謝青山不厭頻

過漫園訪陳元伯即贈

室邇何須著屐迎開門即有住山情  
亭花影接池花影  
林葉聲傳砌葉聲  
官冷尚能容下榻  
人間常得共敲枰  
不嫌剝啄驚棲鶴  
日向桐陰取次行



林蕙堂全集卷十九